



शोध आलेख

डॉ. गोरधनसिंह शेखावत रै काव्य मांय राजनीतिक चेतना

सिया चौधरी

शोधार्थी-राजस्थानी

महाराजा गंगा सिंह विश्वविद्यालय

बीकानेर (राज.)

ग्राम-पोस्ट : भढाडर, जिला-सीकर (राज.)

332315

साहित्य समाज रो अंग व्हे, जुग सापेक्ष व्हे, इण कारण सामयिक थितियां रो असर साहित्य माथे भी पडै। रचनाकार जद रचना करै तो वो आपरै जुगबोध सू अळगो नीं रैय सकै, उणरै जुग रो साच किणी न किणी रूप मांय उण री रचना मांय परतख व्हे ईज है। वो समाज मांय जिको कीं निरखै-परखै है, उणनै आपरी रचना रो विसै बणावै। राजनीति रो सीधो जुड़ाव समाज सू व्हे है, इण वास्तै कवि रो संबंध प्रत्यक्ष या परोक्ष रूप सू राजनीति सू भी जुड़ जावै, इण सू जिकी पीड़ा अर घुटण वो अणभव करै वा फगत उण री नीं व्हेयर आखै समाज री व्हे।

राजस्थानी साहित्य मांय राजनीतिक चेतना रा सुर सदा सू ई मुखरित व्हेता रैया है। राजस्थानी कवि-लेखक आपरै साहित्य रै मारफत समाज री राजनैतिक परिस्थितियां, वारी कमजोरियां अर बुराइयां नै उजागर कर जनता नै आपरा अधिकारां वास्तै जागरूक करता रैया है। आजादी सू पैली राजनीतिक चेतना राष्ट्रीयता, अंगरेजी सासन अर सोसण रो विरोध, देस भगती, स्वाभिमान आद सू जुड़ियोड़ी ही, पण आजादी रै पछै रा दौर मांय जिण भांत सत्ता परिवर्तन व्हियो अर आजादी सू मोहभंग री थितियां उपजी, उणरो असर अटै रा लिखारां माथे भी पड़ियो। आजादी रै पछै प्रजातंत्र री थरपना होयी, पण इण सू आम मिनख नै कोई खास फायदो नीं मिल सकयो अर उण री उम्मीद टूटगी, जिण रो कारण हो सत्ताधारी नेतावां रो जनता रै प्रति कर्तव्य नै भूल'र राजनीति नै आपरी स्वारथपूरती रो साधन बणा लेवणो। अँडा बगत मांय अटै रा कवि चुप नीं रैय सकता हा। राजनीति रै इण कूड़-कपट नै साम्हीं लावण वास्तै वै बरोबर आपरी लेखनी चलायी अर आपरै लेखन सू जनचेतना फैलावण रो कारज करियो।

डॉ. गोरधनसिंह शेखावत राजस्थानी साहित्य मांय आधुनिक भावबोध रा मानीता रचनाकार हा। आपरो जलम शेखावाटी अंचळ रा झुंझुनू जिला रै गुड़ा गांव मांय 10 अप्रैल, 1941 ई. नै व्हियो। आप राजस्थानी साहित्य री नूवी कविता रा पैली पांत रा कवि हा। तेजसिंह जोधा रै संपादन मांय नूवी विचारधारा री अैतिहासिक पत्रिका 'राजस्थानी-अेक' निकळी, जिकी नूवी कविता रै संदर्भ मांय अेक नूवा आंदोलण री सरुआत ही। इण मांय उण बगत रा पांच नूवा कवि- तेजसिंह जोधा, पारस अरोड़ा, मणि मधुकर, ओंकार पारीक अर डॉ. गोरधनसिंह शेखावत सामल हा। नूवी कविता नै थापित करण मांय इण पत्रिका री मोटी भूमिका रैयी। आज भी जद नूवी कविता री बात चालै, इण पोथी माथे चरचा जरुर व्हे।

डॉ. शेखावत अेक सजग कवि रै साथै अेक संवेदनशील मिनख हा। आपरो लेखन अर चिंतन सदीव सामाजिक सरोकारां सू जुड़ियोडो रैयो। आप रै अणभव अर संवेदना सू आपरो जुड़ाव मानवमूल्यां सू रैयो अर इण मानवीय जथारथ नै साम्हीं लावण री खेचळ भी आप करता रैया। लेखक जिण समाज मांय रैवे, जिण भांत री अबखायां मांय जीवै, उणरो जथारथ चित्रण उणरै लेखन मांय सहजां प्रगट व्हे। वारो साहित्य भी जुगचेतना सू रातो-मातो है।

डॉ. गोरधनसिंह शेखावत री कविता री तीन पोथ्यां छपियोडी है— 'किरकर', 'पनजी मारू' अर 'खुद सू खुद री बातां'। आं तीनों पोथ्यां मांय आपरी राजनीतिक चेतना भोत ई गैराई सू साम्हीं आवै। 'किरकर' मांय 'मिनी कवितावां' है जिकी कम सबदां मांय आपरी बात नै सपाट तरीकै सू कैवण री खिमता राखै है। इण कवितावां मांय कैयी कवितावां मंगसा पड़ता मानवीय रिस्ता अर जीवण री अबखायां नै साम्हीं लावै, बटै ई समाज अर राजनीति रा बिगड़ता हालातां नै भी जिण ढंग सू परौटे, वो न्यारो-निरवाळो ईज है। समकालीन राजनीति रो जिको परिवेस हो, उण माथै व्यंग्य करता आप लिखियो है :

सरेआम लोगां रै मुंडा आगै
ईमान री अरथी नै
खूंअै माथै उटाय'र भागती टोळी
अर गीलै अंधारै मांय
खोज सूंघती जनता भोळी।¹

आजादी रै पछै रो जिको बगत हो वो राजनीतिक उथळ-पुथळ रो हो। इण बगत नै डॉ. शेखावत आपरी निजरां सू देख्यो अर परख्यो है, जिणरो असर आपरै लेखन माथै भी पड़ियो। आप अेक शिक्षक होवण रै साथै ई अेक लेखक भी हा, इण वास्तै बदळती राजनीतिक थितियां सू निरपेख नीं रैय सकता हा। आपरो लेखन राजनीतिक अव्यवस्था सू बाथेड़ा करतो लखावै। देस आजाद व्हियां नै कीं दसक ई बीत्या हा, पण फेर भी राजनेतावां री कुटळाई सू जनता आखती व्हैय चुकी ही अर आम लोग ठगीज्योडा मैसूस करै लागा हा। वानै आस ही कै आजादी रै पछै वारी हालत सुधर जावैला, वानै सोसण सू मुगती मिलैला अर समानता, न्याय अर आजादी रो असल अणभव व्हैला। पण औ सुपनो बेगो ई फीको पड़ग्यो। जिण भरोसै माथै आजादी री थरपना व्है ही, उणरी जमीन अब तिडकण लागी ही। 'पनजी मारू' पोथी मांय आप खुद इण भरोसै रै डूंगर नै तोड़ण री बात करी है :

म्हैं खुद कैवूं
तोड़ो ई भरोसे रै डूंगर नै
ई रै माथै चढतां-चढतां
गोडा रै मांय पाणी भरीजगो।²

डॉ. गोरधनसिंह शेखावत ग्रामीण संवेदना रा कवि हा। गांव आपरै चित्त मांय सदा रैयो। पण आजादी रै पछै गांवां री थितियां मांय जिका बदळाव आया, चुनावी राजनीति रै कारण लोकतंत्र री जिकी दसा व्है अर गांवां रो परिवेस बिगड़ियो, उणरी चिंता आपरी कविता रो मूळ सुर बणगी। इण सू उपजी सामाजिक विडरूपता अर गांवांई जीवण री अबखायां नै आपरै न्यारै ढाळै सू प्रस्तुत करणै री खिमता आपरी कवितावां मांय निजर आवै :

आजादी रै अत्ता बरस पछै
मांदो है ओ गांव
खून सू भरियोडी है
इण री गळियां
धूजै रोज मिनखपणो
पेट रै भंगज सूं
सिळगै लोगां रो अंतस।³

डॉ. शेखावत आपरै बगत रै सामाजिक अर राजनीतिक माहौल नै गैराई सू परख्यो है अर उण सू उपजी विसंगतियां नै साम्हीं लावण री खेचळ करी है। आपरै लेखन मांय अेक साच है, जिणसू पाठक कविता रा सबद ई नीं बांचै, उणरी भावनावां नै भी मैसूस कर सकै। आप समकालीन मुद्दां नै उटाय, नूवी अर ओपती ओपमावां रै जरियै वानै साम्हीं राखी, जिणसू आपरी रचनावां घणी प्रभावसाली बणी है।

डॉ. शेखावत री कवितावां मांय समकालीन राजनीतिक थितियां सारू अेक रोस है, जिको व्यंग्य रै रूप मांय प्रगट व्है है। जिण भांत चारुं कांनी लोकतंत्र रै नांव माथै जनता लूटीज रैयी है अर राजनेता कुरसी री चावना में ओछी राजनीति कर रैया है, उण सू प्रजातंत्र माथै भी सुवाल उभा व्है जावै है। अैड़ा ही सुवाल डॉ. शेखावत 'पनजी' रै ओळावै पूछै :

कुणसी बोरडी रै
लागै पिरजातंतर
बूझाआळा नै पूछूं
या रंगू स्यामी नै
इण रो मंतर।⁴

सत्ता किणरी भी हुवो, बा हमेसा जनता पर आपरो नियंत्रण थापित करणो चावै। 'जनसेवक' नै जनता चुणै पण ज्यू ई 'जनसेवक' सत्ता मांय आवै, वै आपरी मूळ जिम्मेवारी सू अळगा होय'र स्वारथ री राजनीति मांय रम जावै। जनता रै हितां री अणदेखी व्हेण लाग जावै। जद इण भांत सत्ता रो दुरुपयोग व्हे तो समाज मांय असंतोख अर विद्रोह री लै'र उठै। औ असंतोख जनता री अवाज बण साम्हीं आवै अर समकालीन साहित्य मांय साफ-साफ झळकै। डॉ. शेखावत री कवितावां मांय भी आं थितियां सारु असंतोख साव देख्यो जाय सकै है। आपरी 'स्याबास' कविता इण रो अेक उदारण है :

भायला! गजब है थूं
अर अजब है थारो देस
जवानी में ई टूटग्या इण रा दांत
थूं हंसतो रैयो इणरी बोखी जबान माथै
मरोड़तो रैयो टांग
भूखां रा साथी भगवान री
अब तो झुक्याई
इण देस री कमर, पण थारो
सवारी रो सौक पूरो नीं हुयो।⁵

साहित्यकार री आ जिम्मेवारी व्हे कै वो समाज री नस नै पिछाणै अर आपरी रचनावां सू सोसण रै खिलाफ अवाज उठावै अर जनता नै भी प्रेरित करै। इण सू ज्यादा फरक नीं पड़े कै वा रचना किण भांत री है, पण वा समाज रै हितां री रक्षा करण आळी व्हे, अन्याव रै विरोध में ऊभी व्हेण आळी व्हे। डॉ. शेखावत री कविता 'मुट्ठी' भी मिनख नै उणरी भूख री ताकत नै पिछाणवा री बात करै, क्रांति री बात करै। मिनख जे चावै तो राज अर समाज नै पलट सकै है :

सोचो, पछे कांई हुवैलो
थारी मुट्ठी सू चिमकै
चांद अर सुरजी
थारी मुट्ठी सू धूजै
डूंगर अर आभो
थारी मुट्ठी सू पलटै
राज अर समाज
इण वास्तै
पिछाणो मुट्ठी री ताकत
थोड़ा सावचेत बण'र।⁶

राजनीति रो चरित्र अर सियासत जैड़ी विसंगतियां सू सामाजिक थितियां रो बिखराव अर उणसूं बदळता जीवणमूल्यां वास्तै प्रतिक्रिया डॉ. शेखावत री कवितावां मांय भोत गैराई सू साम्हीं आयी है। आपरी लांबी कविता री पोथी 'खुद सू खुद री बातां' मांय आजादी रै पछै री सामाजिक अर राजनीतिक थितियां रो बखूबी बखाण है। इण कविता मांय जटै सत्ता अर अव्यवस्था रै खिलाफ विद्रोह रा सुर उठ्या है, बटै ई इण सू दुखी जनता रै दरद नै भी वाणी दिरीजी है। इण कविता मांय जूण रै जथारथ नै जिण व्यंग्यात्मक रूप सू आप प्रगट करियो है, वो सरावणजोग है। बोट री राजनीति माथै व्यंग्य करता वै लिख्यो :

कदै-कदै सोचूं
ओ गैलो पायचो क्यूं टांक राख्यो है
पायचा में नीं परजातंत्र
किणरै वास्तै उडीको
नेताजी री बाट
बै तो बोट रै घोड़े चढ'र
भागगा दड़ाछंट।⁷

राजनीति रो मूळ उद्देश व्हे समाज रा हर वरग नै सामाजिक अर आर्थिक रूप सू ऊंचो उठाणो। राजनीति आम मिनख रै जीवण नै सुधारण रो अेक जरियो है, पण आज देखां तो राजनीति रो ढंगढाळो भोत न्यारो है। लोकतंत्र रै नांव माथै जनता साथै धोखो व्हियो। जननेतावां रो आम जनता रै प्रति वैवार, राजनीतिक भ्रिस्टाचार अर सत्ता री लालसा इण लोकतंत्र री मूळ भावना नै भोत सीमा तांई प्रभावित करी है। डॉ. शेखावत री रचनावां मांय लोकतंत्र री आं थितियां वास्तै अेक पीड़ा निजर आवै है। आप

लोकतंत्र रै आदरसां अर वास्तविकता रै बिचाळै री खाई नै सावचेती सूं दरसावण री खेचळ करी है। आज राजनीति भलाई कूड अर दोगलापण रा कादा मांय डूब री है, पण फेर भी इण कादै में कळीजण सारू जणो-जणो तरळा लेवै :

आज धरम-करम हुयगी राजनीति
रीत-नीत हुयगी राजनीति
अर बौपार बणगी राजनीति
राजनीति रै मुगट री लड़ाई में जूझ रैया
सैर, गांव अर ढाणी
तरळा लेवै जणो-जणो
राजनीति रै कादै नै खावण सारू।⁸

डॉ. शेखावत रै काव्य में राजनीतिक चेतना अठै सुभट निजर आवै है। राजनीति रा जाळ मांय उळझियोडै मिनख री मनगत नै आप पिछाणी है। आ कविता जठै सत्ताधारी राजनेतावां रा स्वारथ नै उजागर करै, स्वारथी सियासत रो विरोध करै, बठैई मिनख रै मिनखपणै रो पख भी लेवै। आपरी रचनावां आज री माडी राजनीतिक व्यवस्था री फगत आलोचना ई नीं करै, समाज नै सोचण अर बदळाव वास्तै प्रेरणा देवण रो कारज भी करै। मिनख नै खुद आपरी हिम्मत सूं ई जुगां सूं बंध्योडा दावणां खोलणा पडसी :

पण म्हैं अेक चीज चूकूं नीं
हिम्मत
इण सूं ई खोलणां पडसी जुगां रा दावणां
झंझट सूं डरणो कांई
कदै पंथी तो कदै पावणा
अब तो थरपणी पडसी
खून-पसीना सूं मिनख री मूरत।⁹

सार रूप मांय कैय सकां कै डॉ. गोरधनसिंह शेखावत अेक कवि रै रूप मांय हरमेस आपरी बारली थितियां सारू सावचेत रैया। आपरी काव्य जातरा मांय इस्या कैयी पड़ाव आवै जठै आपरो कवि मन आपरै असवाडै-पसवाडै घटती राजनीतिक थितियां सूं आकळ-बाकळ व्हे जावै। आ भी है कै आप निसचै ई अेक चोखी राज-व्यवस्था रा हिमायती रैया हा, पण आजादी रै पछै जिको प्रजातंत्र आम मिनख रै पांती आयो, उणरो सरूप न्यारो ई हो। डॉ. शेखावत रै काव्य मांय इण लेखै निरासा साव निजर आवै है। आज भी लोकतंत्र मांय लोक री भागीदारी नीं व्हेय'र अेक वरग विसेस री भागीदारी ई रैया है, जिका लोकतंत्र नै फगत आपरी स्वारथ री पूर्ति रो साधन बणा लियो। इण थितियां वास्तै आपरै काव्य मांय गैरो रोस अर दरद निजर आवै। आपरी कवितावां मांय आपरो खुद रो संवेदनात्मक अणभव अर झेल्योडै जथारथ रो दरद है, जिको आं कवितावां सूं मिनख रै मरम नै पकडै अर सामयिक थितियां सारू चेतावै।

सन्दर्भ सूची :

1. डॉ. गोरधनसिंह शेखावत, किरकर, राजस्थानी ग्रंथागार, जोधपुर, 2005, पाना सं. 16
2. डॉ. गोरधनसिंह शेखावत, पनजी मारू, भंवर प्रकाशन, गुढा-झुंझुनू, 1987, पाना सं. 7
3. सागी, पाना सं. 12
4. सागी, पाना सं. 13
5. सागी, पाना सं. 22
6. सागी, पाना सं. 76
7. डॉ. गोरधनसिंह शेखावत, खुद सूं खुद री बातां, भंवर प्रकाशन, गुढा-झुंझुनू, 1990, पाना सं. 13
8. सागी, पाना सं.34
9. सागी, पाना सं.18